

身記功明善糾禁漏泄佩者不得妄傳傳非其人  
不依年限輕泄實文身被風刀之考沒命鬼官殃及七玄神父運蒙山之石塞九源之河  
深慎奉行

上清除六天之文三天正法後聖君受太上清虛小有天王撰集上仙真錄總名為六天文三天上真正法以捕萬鬼收束衆邪七百年三傳一百年有其人聽再授未青縑三尺為要信青布四十三尺為密誓金縑五雙為指天大誓男受授文不祭女受當祭相授齋三日或七日又於齋內奉有經之師好金十兩為通神之信泄閉不從科條者七世獲考如四極科法佩書不經陰炁陰炁濁澆則身受殃大罪身後為下鬼奉之如法必登上清八皇以此為秘仙券有者大陰書名玉簡

太上三天正法經

太上正一法文經

滿七

天師稽首問太上曰道陵常見世間人民困於疲病牢獄桎械枷鎖水火刀兵虎狼蟲蛇衆苦危難不能自免痛惱辛酸死亡夭折枉橫非一不知從何緣來而值斯毒不知修何功德可得度脫惟願天尊大慈開宥令知所犯得出憂悲太上告道陵曰皆由人民不信宿命罪福因緣輕師慢道破齋犯戒違負天地日月星辰攻根伐本背正入邪欺凌貧賤呪詛鬼神穢辱三尊不忠不孝兄弟不睦父子不慈夫婦不和男女不順更相殘害矯詐百端殺生偷盜邪淫嫉妬慳貪愚癡惡口兩舌綺妄不真飲酒食肉穢污天真恃強凌弱倚官挾勢為君無道為臣不忠罔上欺下損傷百姓枉害忠良縱放無度致遭病苦厄難相逢是故天有九醜殺鬼各將徒衆九千萬人乘雲馭氣因風傍雨栖泊林木依附人家伺其衰怯隨託衣服流精飲食入人臟腑或居宅舍行九種厄難布在世間治此惡人令歸善道若持齋禮拜行道誦經燒香散花受

誠懺悔布施發願救濟貧窮放贖生命修營靈觀建立精舍玄壇法宇廣追福田作諸功德即得免其災厄度脫危苦若不信罪福殺生偷盜飲食酒肉等毀三寶輕慢出家破壞形像行諸惡業則衆厄加身遇其輻軻田蟲虛耗畜養死亡仕官黜退人口夭傷所求不利所願不成九厄者  
一者疾病謂風寒暑濕疫氣瘟行疰癘癩癧霍亂下痢邪精鬼疰一切病惱苦痛纏身不能飲食形容消瘦求生不得求死不得晝夜困楚坐卧不寧  
二者牢獄謂官家口舌文書枉橫桎械枷鎖鞭撻楚撻拷掠身形痛苦難忍連及父母兄弟妻兒眷屬累歲終年莫能自出  
三者刀兵謂遭逢無道殺戮賢良或枉加寇害劫賊緣對逢其斷割手足分張或為國征討遭其斫射破裂尸形骨肉離散詞請禽獸魂飛異域永無依託  
四者水漂謂洪水洋溢彌天流蕩川谷波騰遇其淹沒父子同淪骨肉消散填於溝壑飼

其魚鱉或行江海及諸川谷即達沈溺形消水府

五者火燒謂行山澤逢諸野火及以居家值其焚灼形體焦然

六者毒傷謂虎狼蟲蛇蜂毒藥毒及草木花葉傷損皮膚或惡氣毒物中身入腹痛苦難堪

七者壓迫謂山石崖岸屋宇瓦木崩壞摧折壓迫損傷手足頭目痛楚難忍坐卧不安

八者驚恐謂官家威勢水火刀兵風雷震擊惡禽猛獸魍魎邪精奄來迫迫恐怖不寧魂神號喪便至亡殞

九者饑寒謂公私使役遠出他方遭遇險戩水火兵寇以相凌迫衣糧乏絕或居家貧窶常受饑寒皆是九醜殺鬼主之九醜鬼者

一曰狄星二曰狂雲三曰衆妖四曰天乖五曰驛驟六曰甘篤七曰毘狂八曰警子昌九曰值俱各司一厄常行人間復有五帝神官各行五厄以伺惡人

一者青帝神官行青瘟青疫青毒青蠱青蠹

青吹逢之者頭痛壯熱傷寒時氣霍亂下痢手足煩疼肩背強直不能飲食身體痛楚骨肉辛酸言語恍惚不自覺知

二者赤帝神官行赤瘟赤疫赤毒赤蠱赤蠹赤吹遇之者官家牢獄桎梏枷鎖文書口舌

刑徒繫閉鞭笞考楚癩惱百端

二者白帝神官行白瘟白疫白毒白蠱白蠹白吹遣之者刀兵劫賊虎狼蟲蛇蜂毒毒物以相中害傷損身形

四者黑帝神官行黑瘟黑疫黑毒黑蠱黑蠹黑吹值之者江河山谷水泉沈溺漂流淹沒淪蕩死亡

五者黃帝神官行黃瘟黃疫黃毒黃蠱黃蠹黃吹當之者山石頽毀屋宇崩壞車破馬亡草木壓逐衆毒加身此等神官各將殺鬼三百萬人手持五刀行於人間

一曰木刀看人之時身體寒熱皮膚痛痒起動不安手足酸楚風狂恍惚坐卧不寧  
二曰火刀中人之時頭痛壯熱遍身疼痛言語謬誤面目變赤

三曰金刀中人之時咳嗽上氣骨節痛楚或身上生瘡

四曰水刀中人之時霍亂下痢面目青黑身體浮腫手足煩疼

五曰土刀中人之時腹內脹滿飲食不消從此五者轉生百病使人形容消瘦魂魄飛揚常夢與死人同遊滅其算命名書黑簿或年命沒在黑星赤宿天羅地網一切灾厄之者皆當先以身中上服造救苦天尊寫此寶經作度厄神幡皆以九為數彌多為佳然長明燈晝夜不絕并誦經行道懺悔受戒燒香散

花設齋念道救濟危苦捨放囚徒布施窮乏放贖生命立其高座廣召有德講說大乘立觀度人行諸善願晝夜不息克得脫離灾厄年命長延

太上又曰若人常能預造十方天尊一軀十軀百軀千軀萬軀隨力所堪復寫三洞衆經一部十部百部千部萬部流通誦又請道士轉讀三洞一切衆經行道啓願請福禳灾度人立觀最為第一不可思議若不能如此

但清靜宅舍沐浴身心晝夜讀誦此經禮拜十方天尊燒香解厄散花陳願自得免諸災難獲福無窮

太上曰若欲解厄消灾當取青絲左紐作九子繩令長九尺金環九枚或銀銅等先結一環於繩頭燒香然燈多少之限皆以九數之東向安坐讀誦此經每一遍一卷則就環一結滿九結後又結一環如此竟九環即設齋解結名曰解天九厄開天九結度名九天延生九真解竟復依前結之若有多人各結各解若滿九萬遍則終身無厄名上東華若能至解結之時造像燈幡各九諸天稱讚福祚巍巍其結或於三尊御前若法師衣帶而誦誦結之若自讀誦結已衣帶矣

禮十方天尊法

面東方九十拜東南方百二十拜南方三十拜西南方一百二十拜西方七十拜西北方一百二十拜北方五十拜東北方一百二十拜向西北禮上方三百六十拜向東南禮下方一百二十拜各一千二百拜皆須拜念

當方天尊名號云

至心歸命東方玉寶皇上天尊  
至心歸命東南方好生度命天尊  
至心歸命南方玄真萬福天尊  
至心歸命西南方太靈虛皇天尊  
至心歸命西方太妙至極天尊  
至心歸命西北方元量太華天尊  
至心歸命北方玄上玉晨天尊  
至心歸命東北方度仙上聖天尊  
至心歸命上方玉虛明皇天尊  
至心歸命下方真皇洞神天尊  
每禮一方竟皆長跪三上香懺曰弟子某甲肉人凡夫生在世間從年七歲以來違天犯地呵風罵雨裸露星辰輕慢三寶穢污十方不依科禁毀正真不忠不孝殺生偷盜邪淫顛倒綺言妄語惡口咒詛罪條無量不可記錄不自覺知今日首謝歸命天尊特願天尊大慈開宥原赦某甲無量罪愆乞度灾厄名書神仙長生簿中更三上香叩頭捧頌太上曰於本命行年太歲大小墓上然燈誦

經解厄消灾十二時二十八宿上然燈延年益算門戶上然燈益口求財庭中然七星燈解牢獄禁閉皆當燒香誦經又曰常以月朔望晦清齋燒香然二十八宿燈晝夜不懈諸天為子却死上生益算延年若能誦三洞大經福降無窮矣天師稽首稱善而退

太上正一法文經